



MALAYSIA

PENYATA RASMI PARLIMEN

Parliamentary Debates

KAMAR KHAS

Special Chamber

**PARLIMEN KEEMPAT BELAS
PENGAL KETIGA
MESYUARAT KETIGA**

K A N D U N G A N

UCAPAN DI BAWAH USUL BERKENAAN PERKARA TADBIR KERAJAAN [P.M. 17]:

- **Menukar Bulatan SS15, Subang Jaya**
- *YB. Tuan Wong Chen (Subang)* (Halaman 1)
- **Pencapaian Matlamat 30 Peratus
Pemilikan Saham Ekuiti Bumiputera**
- *YB. Tuan Chan Ming Kai (Alor Setar)* (Halaman 2)

**MALAYSIA
KAMAR KHAS
PARLIMEN KEEMPAT BELAS
PENGKAL KETIGA
MESYUARAT KETIGA**

Rabu, 11 November 2020

Mesyuarat dimulakan pada pukul 12.00 tengah hari

DOA

*[Timbalan Yang di-Pertua (Dato' Mohd Rashid Hasnon)
mempengerusikan Mesyuarat]*

**UCAPAN DI BAWAH USUL
BERKENAAN PERKARA TADBIR KERAJAAN (P.M. 17)**

Menukar Bulatan SS15, Subang Jaya

12.04 tgh.

Tuan Wong Chen [Subang]: Terima kasih Tuan Yang di-Pertua. Terima kasih kepada Yang Berhormat Timbalan Menteri, sudi untuk menjawab soalan saya. Soalan saya ringkas, sila nyatakan hasil kajian pihak kementerian untuk menukar bulatan SS15 Subang Jaya ke persimpangan yang berlampu isyarat. Tadi Yang Berhormat Timbalan Menteri memberitahu saya, dia sebenarnya dahululah pada tahun 2001 adalah memang duduk di kawasan situ. Terima kasih.

Timbalan Yang di-Pertua [Dato' Mohd Rashid Hasnon]: Sila, Yang Berhormat Menteri Kanan Kerja Raya atau Timbalannya untuk menjawab.

12.04 tgh.

Timbalan Menteri Kerja Raya [Dato' Eddin Syazlee bin Shith]: *Bismillahir Rahmanir Rahim. Assalamualaikum warahmatullahi wabarakatuh* dan Salam Sejahtera. Dengan izin Tuan Yang di-Pertua dan terima kasih Tuan Yang di-Pertua dan juga terima kasih kepada Yang Berhormat Subang di atas soalan yang dikemukakan.

Untuk makluman Ahli Yang Berhormat, hasil semakan mendapati bahawa bulatan SS15 Subang Jaya yang di bawah pemantauan dan penyenggaraan Lembaga Lebuhraya Malaysia melalui syarikat konsesi iaitu New Pantai Expressway Sdn. Bhd. (NPE) adalah merupakan Bulatan Kewajipan.

Untuk makluman Ahli Yang Berhormat juga, Lembaga Lebuhraya Malaysia (LLM) dan Syarikat Konsesi iaitu New Pantai Expressway Sdn. Bhd. (NPE) telah melantik juru perunding trafik untuk mendapatkan cadangan penyelesaian bagi mengatasi masalah kesesakan ini dan hasil kajian mendapati bahawa kesesakan ini hanya berlaku pada waktu puncak.

Juru perunding juga mencadangkan agar jalan susur keluar (*dedicated lane*) dengan izin, disediakan di setiap jalan susur bagi membolehkan kenderaan membelok ke kiri tanpa perlu menunggu bulatan bagi mengatasi masalah kesesakan yang berlaku.

Jadi kerja penandaan semula garisan jalan di bulatan berkenaan akan dilakukan oleh pihak NPE dan bagi membolehkan dua lorong sedia ada dikekalkan dan jalan susur keluar (*dedicated lane*) akan disediakan sebagai untuk memudahkan laluan.

Kerja-kerja berkenaan dijadualkan akan disiapkan sebelum akhir November 2020 dan juga tertakluk kepada pematuhan prosedur operasi standard (SOP) yang dikeluarkan oleh Majlis Keselamatan Negara (MKN) susulan pelaksanaan Perintah Kawalan Pergerakan (PKP). Jadi selepas ini saya boleh serahkan satu salinan *overall layout* kepada Yang Berhormat untuk rujukan. Sekian, terima kasih.

Timbalan Yang di-Pertua [Dato' Mohd Rashid Hasnon]: Terima kasih, Yang Berhormat Timbalan Menteri.

Pencapaian Matlamat 30 Peratus Pemilikan Saham Ekuiti Bumiputera

12.07 tgh.

Tuan Chan Ming Kai [Alor Setar]: Terima kasih, Tuan Yang di-Pertua, Yang Berhormat Menteri. Saya ingin menarik perhatian pihak kerajaan ke atas isu pencapaian matlamat 30 peratus pemilikan saham ekuiti bumiputera.

Semenjak pelaksanaan Dasar Ekonomi Baru (DEB) serentak dengan Rancangan Malaysia Kedua yang berdasarkan Rangka Rancangan Jangka Panjang Pertama (RRJP1), pencapaian 30 peratus pemilikan saham ekuiti bumiputera telah ditetapkan sebagai salah satu matlamat utama yang perlu dicapai menjelang tahun 1990.

Walau bagaimanapun, matlamat tersebut masih tidak tercapai dan tetap termaktub dalam RRJP2 dan RRJP3 serta sepanjang RMK3, 4, 5, 6, 7, 8, 9, 10 dan 11 dan terkini dalam Wawasan Kemakmuran Bersama 2030.

Yang Berhormat Menteri, penilaian yang lebih jujur dan adil perlu dijalankan ke atas sesuatu dasar yang telah 50 tahun masih tidak tercapai matlamatnya. Pengiraan ekuiti ini tidak melihat kepada transaksi jual beli dan hanya berdasarkan maklumat pegangan saham pada akhir tahun kewangan.

Pendekatan ini membenarkan ekuiti dijual untuk memastikan matlamat 30 peratus tidak tercapai supaya menjustifikasikan penganugerahan ekuiti bumiputera tetap relevan sepanjang hayat. Minta Yang Berhormat Menteri menjelaskan bagaimana matlamat dasar mampu tercapai selagi pendekatan ini masih wujud.

Dasar Liberalisasi Ekonomi turut menyumbang kepada peningkatan pemilikan ekuiti asing yang secara langsung mengurangkan pemilikan ekuiti bumiputera. Minta Yang Berhormat Menteri menjelaskan tindakan yang diambil untuk mengurangkan percanggahan dasar tersebut berlaku.

Minta Yang Berhormat Menteri menyatakan, selain daripada institusi dan agensi Amanah, adakah badan koperasi seperti NAFAS dan Bank Rakyat serta ekuiti yang dipegang oleh Yayasan Islam dan Majlis Agama Islam Negeri diambil kira dalam jumlah ekuiti yang dimiliki bumiputera.

Minta Yang Berhormat Menteri menjelaskan adakah ekuiti yang dimiliki oleh Muslim bukan Melayu yang memenuhi syarat takrifan sebagai status Melayu di bawah perkara 160 Perlembagaan Persekutuan, diambil kira sebagai ekuiti bumiputera.

Yang Berhormat Menteri, terdapat beberapa jenis pendaftaran di bawah SSM. Selain daripada Sendirian Berhad, adakah pendaftaran perniagaan SSM juga turut diambil kira nilai ekuiti. Terdapat banyak syarikat khususnya pendaftaran perniagaan SSM tidak hantar penyata tahunan kepada SSM, minta menjelaskan bagaimana pengiraan diambil jika syarikat dan perniagaan tersebut tiada menyerahkan penyata kewangan.

Minta Yang Berhormat Menteri senaraikan pecahan jumlah nilai dan peratus ekuiti bumiputera yang dimiliki oleh setiap institusi, agensi Amanah dan kategori institusi lain yang menyumbangkan kepada jumlah ekuiti terkini. Sekian, terima kasih.

Timbalan Yang di-Pertua [Dato' Mohd Rashid Hasnon]: Terima kasih Yang Berhormat. Sila Menteri di Jabatan Perdana Menteri untuk menjawabnya.

12.09 tgh.

Menteri di Jabatan Perdana Menteri (Tugas-tugas Khas) [Datuk Seri Mohd Redzuan bin Md Yusof]: Terima kasih Yang Berhormat Alor Setar dan terima kasih, Tuan Yang di-Pertua.

Tuan Yang di-Pertua, Untuk makluman Ahli Yang Berhormat, dalam konteks pemilikan ekuiti korporat bumiputera kerajaan memang telah menetapkan sasaran sekurang-kurangnya 30 peratus pemilikan ekuiti korporat bumiputera di peringkat nasional sejak DEB diperkenalkan pada tahun 1971. Malang, *as you have correctly mentioned*, hasrat ini masih belum tercapai.

■1210

Dalam data terkini yang dilaporkan adalah bagi tahun 2015 bagi pemilikan ekuiti sektor korporat bumiputera adalah 16.2 peratus, bukan bumiputera 30.7 peratus, pemilikan asing 45.3 peratus dan nomini 7.8 peratus. Kedudukan ini jelas tidak setara dengan peratus komposisi dalam jumlah penduduk warganegara iaitu ketika itu 2015 hampir 70 peratus adalah bumiputera manakala etnik Cina – 23 peratus dan etnik India – 7 peratus.

Untuk makluman Yang Berhormat, saya ingin menegaskan bahawa kerajaan sentiasa membuat penilaian semula ke atas semua perancangan dasar, strategi dan inisiatif melalui Rancangan Malaysia Lima Tahun dan dalam Kajian Separuh Penggal Rancangan Malaysia berkaitan. Semakan ini melibatkan keseluruhan kementerian, agensi, jabatan di peringkat Persekutuan, negeri dan kerajaan tempatan.

Di samping itu, penglibatan daripada pihak swasta, badan bukan kerajaan (NGO), pertubuhan berasaskan komuniti (CBO) menggunakan pendekatan penggubalan dasar secara *bottom-up* dan sesi libat urus dengan pelbagai pihak sebelum dibentangkan di Mesyuarat Jemaah Menteri dan Parlimen.

Walaupun hampir 50 tahun sasaran sekurang-kurang 30 peratus pemilikan ekuiti korporat bumiputera ini ditetapkan, namun realitinya ketika ini bumiputera masih berada di dalam kedudukan tercorot dari segi pemilikan kekayaan dan pendapatan. Lebih membimbangkan, 71.4 peratus daripada kumpulan pendapatan isi rumah B40 adalah terdiri daripada bumiputera.

Bagi isu pendekatan pengiraan ekuiti pula, untuk makluman Ahli Yang Berhormat, ia adalah berdasarkan maklumat pegangan saham sesebuah syarikat pada akhir tahun kewangan melalui Penyata Tahunan yang diserahkan di Suruhanjaya Syarikat Malaysia (SSM). Oleh itu, pengiraan ekuiti ini tidak melihat kepada transaksi pembelian atau penjualan saham.

Dasar Liberalisasi Ekonomi yang dilaksanakan oleh kerajaan adalah bagi memastikan ekonomi negara berkembang dengan pesat tanpa menjejaskan pemilikan ekuiti rakyat tempatan. Sehubungan itu, kerajaan melalui Rancangan Malaysia Lima Tahun dan Kajian Separuh Penggal Rancangan Malaysia sentiasa meneliti dasar, strategi dan inisiatif yang dilaksanakan agar memberi peluang, manfaat dan kelebihan yang saksama kepada rakyat termasuk bumiputera, tanpa meminggirkan mana-mana etnik di Malaysia.

Tuan Yang di-Pertua, untuk makluman Ahli Yang Berhormat, setiap pemilikan saham sama ada oleh individu atau institusi bumiputera dan bukan bumiputera, asing dan nomini dalam syarikat yang didaftar di SSM dan syarikat yang disenaraikan di Bursa Malaysia akan diambil kira dalam pengiraan ekuiti ini.

Pengiraan ekuiti sektor korporat ini adalah berdasarkan nilai pegangan saham sesebuah syarikat mengikut etnik yang didaftar di SSM dan disenaraikan Bursa Malaysia. Faktor agama tidak diambil kira dalam pengklasifikasian pengiraan ekuiti ini. Pengiraan ekuiti juga adalah berdasarkan syarikat Sendiri Berhad dan Berhad yang telah menyerah simpan laporan tahunan dan laporan kewangan syarikat kepada SSM. Syarikat berstatus *enterprise* atau milikan tunggal tidak diambil kira dalam pengiraan ini kerana tidak perlu menyerah simpan kedua-dua laporan tersebut kepada SSM.

Tuan Yang di-Pertua, kerajaan melalui Syarikat Pengurusan Dana Ekuiti Persendirian iaitu Ekuiti Nasional Berhad (Ekuinas) telah melaksanakan pelbagai aktiviti bagi menggalakkan penjanaan kekayaan serta penglibatan bumiputera secara saksama dan mampan berlandaskan prinsip mesra pasaran, merit dan telus menerusi penubuhan syarikat-syarikat peneraju generasi baharu di Malaysia.

Sejak penubuhan Ekuinas pada tahun 2009 hingga 31 Disember 2019, ianya berjaya meningkatkan ekuiti bumiputera ke RM5.4 bilion bersama dengan 1.5 kali ganda modal yang dilaburkan. Ini bermakna ada anjakan ataupun ada *improvement* dari segi pemilikan ekuiti bumiputera.

Melalui model yang dipraktikkan ini, Ekuinas akan dapat mengembangkan ekuiti bumiputera di Malaysia dan meningkatkan penciptaan serta pemilikan kekayaan bumiputera dalam jangka masa panjang. Walaupun, Ekuinas tidak membuat pelaburan strategik seperti Khazanah, Kumpulan Wang Simpanan Pekerja (KWSP), Permodalan Nasional Berhad (PNB), Lembaga Tabung Angkatan Tentera (LTAT) ataupun Kumpulan Wang Persaraan (KWAP).

Ahli Yang Berhormat Alor Setar juga meminta senarai pecahan jumlah nilai dan peratus ekuiti bumiputera yang dimiliki oleh setiap institusi, agensi Amanah dan kategori institusi lain yang menyumbangkan kepada jumlah ekuiti terkini.

Untuk makluman Ahli Yang Berhormat, kerajaan akan mengumumkan status terkini pemilikan ekuiti sektor korporat bagi tahun 2016 hingga 2018 dalam pembentangan Rancangan Malaysia Ke-12 yang dijangka pada awal tahun 2021. Justeru kita kena lihat sekiranya kita perlu gubal kembali dasar dalam Rancangan Malaysia yang seterusnya.

Akhir sekali Tuan Yang di-Pertua, sejujurnya, saya berpandangan bahawa hakikat kumpulan bukan bumiputera kurang memberi sambutan dan kerjasama dalam membantu pihak kerajaan untuk pelaksanaan agenda pemerkasaan bumiputera yang selari dengan Perlembagaan Persekutuan.

Saya percaya jika semua pihak memainkan peranan dan memberikan sokongan atas setiap dasar yang diputuskan oleh kerajaan termasuklah dasar pemilikan ekuiti korporat bumiputera ini, maka sasaran akan dapat dicapai dalam masa jangka yang sederhana. Terima kasih, itulah jawapan kepada soalan yang ditanya oleh Yang Berhormat Alor Setar.

Timbalan Yang di-Pertua [Dato' Mohd Rashid Hasnon]: Terima kasih Yang Berhormat Menteri. Ahli Yang Berhormat, dengan itu tamat sesi ucapan di bawah usul berkenaan perkara tadbir kerajaan Peraturan Mesyuarat 17 pada hari ini. Ahli Yang Berhormat, Mesyuarat Kamar Khas hari ini ditangguhkan sehingga jam 12.00 tengah hari esok Khamis, 12 November 2020. Terima kasih Ahli Yang Berhormat.

[Kamar Khas ditangguhkan pada pukul 12.16 tengah hari]